

Chel project è betg dispitevel

Cumegn Vaz: Seira d'infurmaziun sanaziun scola a Lai

DA GION NUTEGN STGIER / ANR

■ Per ena somma dad 11,1 milliuns francs vign la scola a Lai sanada. La populaziun è neida infurmada glindesde seira. Igl davos pled è an diesch deis igl suveran. Chel project para da neir sustignia ferm dalla populaziun.

Avant 60 onns è neida fatga la davosa sanaziun pi gronda dalla scola a Lai. Ossa duess igl bietg neir sano ed amplifitgia cun mantger salv e stanzas da scola tgi correspondan agl basigns dad oz. Da preschaint è Lai 186 scolars secundars e primars. Per igls proxims onns resta chel domber ple u manc uscheia. Glindesde seira è radond 100 persungas cumpareidas alla seira d'infurmaziun noua tgi igls responsabels da cumegn ed igl architect Joos Gredig on preschento chel project dad 11,1 milliuns francs.

Fatg amortisaziuns per chel project

Scu chegl tgi Aron Moser, igl mastral digl cumegn Vaz, è detg duess la finanziaziun da chella sanaziun dalla scola betg esser en problem pi grond. Igls davos treis onns seia sto pussebel da far reservas an ena somma da passa diesch milliuns francs, uscheia tgi igls daners per la sanaziun dalla scola a Lai seian avant mang. Investiziuns per la scola seian per ena vischnanca indispensablas ed er necessarias. En li veiva digls scolars e cun ena buna scola mantgan er betg las famiglias, è detg Moser. Elisabeth Sigron-Cantieni, ella tgi magna igl departamaint da scola e cultura, spera tgi igl suveran sa mossa generosa cun deliberar igl credit per far chella sanaziun. Chegl giaveischa er Stefan Langenegger, igl manader da scola da Lai e Vaz. Per eneda è betg do discussiuns emoziunalas siva dall'infurmaziun



Elisabeth Sigron-Cantieni, la manadra digl departamaint da scola e cultura.

FOTO G. N. STGIER

scu chegl tgi era sto igl cass tar la preschentaaziun digl project piazza da sport. En preschaint è dumando schi igl travagl

da scola vigna forsà redutgia perveia dalla sanaziun digl antier object? Langenegger, el è punctuo tgi seia pussebel da dar

scola er durant igl taimp tgi igl bietg vigna sano, amplifitgia e fatg pi grond. La gronda part dallas lavours ins fetscha dal-

las vacanzas da premaveira e da stad. Schi igl suveran da Vaz deliberescha igl credit dad 11,1 milliuns francs, chegl tgi nign dubitescha, alloura ins vo vedlonder cun la planisaziun. La premaveira 2020 fiss previa d'antschever cun las ampremas lavours. A fegn duessan chellas esser igl aton 2021.

230 000 francs per las uniuns localas

Or digl mez digls preschaints è er neida la dumonda schi las uniuns vegian da paer anc duple tschains per far en'occurrenza ainten la nova aula? Igl mastral Aron Moser è menziuno tgi anvers las uniuns sa mossa igl cumegn an plagna generosadad cun sustignier las uniuns localas mintg'onn cun ena somma da 230 000 francs. Da piglier a tschains l'aula digl bietg da scola costa 150 francs sainza la tribuna e cun la tribuna èn chegl 250 francs. An sasez seia betg previa en dulzamaint da chellas tariffas, è nia detg davart la canzleia digl cumegn Vaz. Igl cumegn Surses, chel pretenda per la sala Grava a Savognin per en'occurrenza tg'ins paia antrada, organisada d'uniuns indigenas, 130 francs sainza tgadafi e 205 francs cun tgadafi. Uniuns d'orsoura paian 250 francs sainza tgadafi e 400 francs cun tgadafi. En om è dumando pertge tgi igl project cumpeggia angal en salv da labor per la scola superioura e betg er egn per la scola primara. Igl manader da scola è detg tgi schi fetscha basigns dastgan er igls scolars primars far adiever da chella stanza da labor. En oter preschaint è lia saveir schi igl antier bietg seia siva la sanaziun er accessibel per persungas cun impedimaint? Igl architect Joos Gredig è confirmo tgi chegl seia uscheia cun esser las rampas tranter igls divers bietsg contanschiblas digl ascensor anor.

«Quadrin» aint igl focus internaziunal

Lucerna: Forum mundial da turissem

DA GION NUTEGN STGIER / ANR

■ 550 participants dad 80 teras èn sa participos alla 6avla ediziun digl Forum mundial da turissem a Lucerna. En tema è er sto: innovaziun. Scu bung exaimpel innovativ è er nia preschento en «Quadrin». Egn digls blers referents è er sto Enrico Uffer, igl patrung dalla Uffer SA. Igl Forum mundial da turissem a Lucerna è s'avano igls davos onns tar en'occurrenza da renom internaziunal. L'emda passada è gia li la 6avla ediziun da chel event mundial. CEO digl Forum mundial da Turissem è Martin Barth, el tgi è avant passa 20 onns sto directour turistic a Savognin. Dalla parteida all'occurrenza internaziunala aint igl Center da congress a Lucerna (KKL) èn stadas 550 persungas digl turissem, dall'economia, dallas universitads, dalla furmaziun e dalla perscrutaziun. Discussiun on ellas cunzont tar igls temas innovaziun, talent e diversitad da manaschamaint. Nia preschento agls 550 participants dad 80 teras scu en fitg bung exaimpel per en product innovativ è er nia en «Quadrin» dalla firma Uffer SA.

Plazzo el agl «Europaplatz»

«Quadrin» è igls davos onn sa fatg en nom scu en product multifunziunal, transportabel, temporar e cun esser da lenn er cun en intern ampernevel e pi tgod. A Lucerna on igls collaboratours dalla firma Uffer SA monto an treis deis igl «Quadrin» cun ena larghezza dad 11 meters ed en'otezza da set meters. Pi prominent fiss strousch sto pussebel da plazar chel. Per en pèr deis è «Quadrin» sto da tgesa agl «Europaplatz», en li tgi totga

tar igls pi bels a Lucerna. Fotografo vign chel da mintga Asiat tgi vign an Svizra ed er da blers digls 1,4 milliuns turists tgi pernotteschan a Lucerna. Igl antier cantun Lucerna è an en onn digl reminent 12 milliuns turists digl de.

I dovra tots dus

Barth, el tgi è er professour alla Scuola ota Lucerna, dei cun esser innovaziun egn digls temas principals digl Forum mundial da turissem 2019 seia per el dalunga sto cler da preschentar «Quadrin» agls participants internaziunals. Lia mussar tar chel forum ins vegia er tgi betg angal turistichers saptgan esser innovativs, mabagn er persungas dad otras branschas scu per exaimpel Enrico Uffer tgi vegia en immens success cuagl «Quadrin» e chegl scu betg «turisticher». Igl turissem seia oz ranviia da bunas ideias tgi dereivan dad otras branschas. Igl madem vala er per exaimpel per l'economia tgi seia dependenta digl turissem.

A pled è er nia Enrico Uffer

Sa tgapescha tgi Uffer è er gia la pusseblidada da referir tar igl Forum mundial da turissem dall'emda passada a Lucerna. Igl patrung dalla Uffer SA è referia quasi scu antschatta tar igls «workshops», las preschentaaziuns, otras occurrenzas e sedutas tar igl tema innovaziun. Referia è el sen fundamaint digl success tgi el è ossa gio varsaquants onns cun «Quadrin». Impressiun è cunzont fatg ad Uffer tgi igls participants da chel event mundial (corifeas digl turissem e dall'economia) discorran betg digl preschaint, mabagn digl avigneir. Dallas innovaziuns digl

2019 seia betg nia discurria blier, persiva da chellas digl 2025, dei Uffer. S'interesso pigl «Quadrin» on alloura er blers represchentaants dallas medias naziunalas ed internaziunalas scu per exaimpel igl emettour da televisiun «BBC». Do pled e fatg a chel vegia Marc Janett, el tgi segna tar la Uffer SA per las finanzas e pigl marketing.

L'istorgia da success cuntinuescha

Igl bietg temporar a Lucerna è gio nia demonto per neir construa da nov an en oter li. Scu gio g'onn passo vign la tribuna digl Festival da musica «Moon & Stars» a Locarno er ad esser en «Quadrin». Chell'occurrenza da musica antscheva igls 11 da fanadour 2019. Far

adiever da «Quadrin» fon er igls organisatours digl Festival da musica «Paléo» a Nyon, en event da msuica cun 230 000 visitaders. Li è chel a parteir digls 23 da fanadour 2019. Giast vign «Quadrin» er ad esser tar la Festa da lotga naziunala alla fegn d'avost 2019 a Zug. Damai ins pò deir tgi l'istorgia da success da «Quadrin» cuntinuescha.



«Quadrin» anmez Lucerna gist dasper igl lai.